

Pour M<sup>re</sup> Nicolas Mazure Prestre, Docteur en  
Theologie de la Faculté de Paris & Maison de Sor-  
bone, & Curé de l'Eglise Parrochiale de S. Paul,  
demandeur aux fins d'une Requête, par luy presen-  
tee à la Cour, le 13. du present mois d'Auril 1641.


Contre les Religieux Minimes de la Place Royale de Paris  
deffendeurs.

24 **L**A REQUESTE sur laquelle la Cour a à prononcer &  
donner Arrest, presentee par iceluy *seur Curé de saint Paul*,  
tend à ce que les Sentences données par le *seur Official*  
de Paris les 9. d'Auril 1624. d'Octobre 1640. & 8. du  
present mois d'Auril 1641. pour ce qui est des Enterremets  
des corps des defuncts & decedez en la parroisse de  
saint Paul (de laquelle il est Curé) soient executées par prouision, &  
nonobstant l'appel interietté, de la premiere d'icelles Sentences par les  
*Minimes*, & autres appellations & oppositions par eux faictes ou à faire,  
sans preiudice d'icelles : Et les *Minimes* pour auoir insisté au contraire  
condamnez aux despens de l'instance.

LES RAISONS, sur lesquelles cette Requête est fondee, sont, entre  
autres, celles qui ensuiuent;

*La premiere*, que les Sentences qu'il demande estre par proui-  
sion executées sont conformes à ce mesme que les *Minimes* ont resolu  
par acte de leur Chapitre, où presidoit le mesme Correcteur que celuy  
qui est à present, sçauoir le *Pere Chaillon*; Et ont mesme iceux *Minimes*  
sommé & interpellé le *seur Fayer*, qui estoit lors Curé de cette Eglise  
Parrochiale, de l'executer conformement à une Ordonnance & Lettre  
d'iceluy *seur Official*, dont il est fait mention dans leur Acte Capitulaire:  
Les *Minimes* ne peuuent pas avec raison, ny mesme avec apparence de-  
battre, ce qu'eux mesmes ont resolu en leur Chapitre & executé, & sommé  
le *seur Fayer*, lors Curé de cette Eglise, d'executer. Et qui peut dire  
que le *Pere Chaillon* ait oublié ce que Dieu a dict & fait escrire par saint  
Paul en son Epistre aux Galates, chapitre 2. *Si qua destruxi iterum hac  
adifico, prauaricatorem me constituo.*

*La seconde des raisons* est, qu'iceluy Curé estant en possession, ainsi que  
les precedents Curez de cette Parroisse, depuis que les *Minimes* s'y sont  
establis, sçauoir est *Messire Antoine Fayer*, *Messire François l'Aduocat*,  
& *Messire Guillaume Mazure*, de faire ce qui est porté par les Senten-  
ces & Ordonnances du *seur Official* & mesme par Acte Capitulaire  
des *Minimes*. & en estant spolié, mesme par excès, iniures & violences  
des *Minimes*, & au preiudice des deffences faictes par la Cour, à eux si-  
gnifices par l'Anglois Huissier d'icelle Cour, comme il appert par le pro-  
cès verbal du Commissaire, & les Certificats des Medecins & Chirurgiens.





giens, & les deffences de la Cour, & Exploit de signification d'icelles qui sont pieces produites en cette instance, sous la lettre B. de la production d'iceluy sieur Curé; Il est bien iuste, & le droit diuin & humain le veulent ainsi, qu'il soit reintegré en sa possession par prouision, & auant toute chose; estant vne des plus iustes & plus vſitees regles du Droit ciuil & Canon *Spoliatus ante omnia restituendus*: Et que deffenses tres-expresses soient faictes aux Minimes d'vſer à l'aduenir de telles voyes de faict, sur les peines qu'il plaira à la Cour.

La 3. des raisons est que ne pouuant estre denié ny reuoké en doute, que iournellement & des aujourd'huy, demain, ou autres iours, il ne se presente pareille occasion d'enterrer des corps, pourquoy les Minimes pourront faire encore pareille entreprise & violence, il est bien iuste & raisonnable qu'il y soit pourueu par la Cour; Et il ne s'y peut pas mieux pouruoir, sauf correction de la Cour, qu'en ordonnant que les sentences du sieur Official Iuge Ecclesiastique, seront par prouision executees pour ce qui est des enterrements: veu mesme que ces sentences sont conformes à ce que les Minimes ont resolu par acte capitulaire en suite & execution d'une precedente Ordonnance d'iceluy sieur Official, & qu'ils ont depuis executee par plusieurs fois, comme il appert par les actes produicts au procès. Il ne peut estre rien ordonné de plus iuste sur tel & semblable differend, que celuy dont est question, sinon que ce qui a esté autrefois resolu & executé, sera par prouision & nonobstant toutes appellations faictes & à faire, & sans preiudice d'icelles entretenu & obserué.

La 4. raison est, qu'il est bien iuste & raisonnable qu'iceluy Sr. Curé lequel laisse entrer iusques dans le chœur de son Eglise, les Minimes & autres Religieux avec leur Croix, lors qu'ils sont conués pour assister aux conuoiſ & porter les corps des decedés qui ont esleu leur sepulture en leurs Conuents, entre à tout le moins iusques au milieu de la nef de l'Eglise Conuentuelle des Minimes & des autres Religieux lors qu'ils y conduisent les corps. Comment peuuent ils raisonnablement & en bons Chrestiens refuser de faire pour autrui ce qu'ils veulent leur estre fait, mais encore refuser iceluy Sr. Curé en personne ayant les habits & marques de Curé, d'entrer dans leur Eglise, & le reiecter avec atroces iniures de voix & de main: Comment & par qui en peuuent ils estre excusés, purgés & iustificés? Ny a-il point subiect d'apprehender à eux & pour eux le iugement de Dieu qui est escript par S. Paul aux Romains chapitre premier vers. 32. disant, *Qui talia agunt digni sunt morte non solum qui ea faciunt, sed etiam qui consentiunt facientibus*: Et saint Bernard l. 3. de *Consid.* c. 4. *Non est bona arbor faciens fructus tales, insolentias, dissolutiones, dilapidationes, simultates, scandala, odia, quodque magis dolendum inter Ecclesias, inimicitias graues, perpetesque discordias; quid si forte nec licet? ignosce mihi non facile adducor licitum consentire, quod tot illicita parit.*

Les Minimes sont bien esloignez del'esprit du Seraphique S. François, qui faisoit & disoit en son Testamēt, *Et si haberem tantam sapientiam quam Salomon habuit & inuenirem pauperculos Sacerdotes huius seculi in Parochiis quibus morantur, nolo predicare ultra voluntate ipsorum, & ipsos & omnes alios volo time-*



*re, amare & honorare sicut meos Dominos, & Domini mei sune.*

Et S. Hierosme reueroit tellemēt les Curez des lieux où il habitoit, qu'escriuant à Heliodore il proteste ne vouloir iamais leur desobeir, pour ce qu'en ce cas ils auoient le pouuoir de l'excommunier; *Mibi ante Presbyterum sedere non licet: illi si peccauero licet me tradere Satana in interitum carnis & spiritus saluus sit in die Domini Iesu.* Ce lieu est canonizé & rapporté au Canon *Alia. 6. ca. 16. qu. 1.*

La 5. raison est, que les *Minimes* qui se veulent preualoir, non seulement d'observer les Commandements de Dieu, mais aussi les Conseils, ne peuvent en conscience desobeir & maltraiter les Pasteurs que Dieu a établis dedans l'Eglise, & qu'il leur commande d'honorer comme leurs Peres, desquels ils reçoient au moins le Sacrement de Baptême.

Les Reguliers, dit S. Hierosme, ne sont que pour pleurer & nō pas pour instruire pour estre brebis & non pour estre Pasteurs: Et si les Papes & les Euesques leur ont permis & cōmandé dans les necessitez pressantes d'administrer quelques Sacrements, & d'annoncer la parole de Dieu aux peuples, ce n'a esté qu'en cas que les Curez n'y peussent satisfaire, ou dans les lieux où il n'y en auroit point du tout; si biē qu'ils ne sont au plus que troupes auxiliaires, & aydes des Curez, auxquels aydes l'Eglise a donné & osté ce priuilege quand elle l'a iugé à propos.

Il se veoit par le 4. Canon du Cōcile de Chalcedoine, des deffences faites sur peine d'excommunication aux Reguliers d'exercer aucunes fonctions Ecclesiastiques & Seculieres, à raison des troubles & scandales qu'ils causoient dès ce tēps là dans l'estat Ecclesiastique & Seculier; *Quoniam Verò quidā Monastico pretextu viuentes Ecclesiastica negotia ciuiliq; conturbant, placuit intentos esse tantummodo Ieiunio & Orationi, in locis in quibus renuntiauerunt saeculo permanentes, nec Ecclesiasticis, nec secularibus negotiis communicent, vel in aliquo sint molesti, propria Monasteria deferentes, nisi forte iis praeceptum propter opus necessarium ab Episcopo Ciuitatis: Transgredientem Verò hanc definitionem nostram excommunicatum esse decernimus, ne nomen Dei blasphemetur.*

D'où les *Minimes* peuvent tirer les consequences, & examiner si l'Eglise peut veoir les violences avec lesquelles ils entreprennent auourd'huy, & plus que tous les autres Religieux, sur les fonctions des Curez, sans derechef fulminer contre eux la mesme Excommunication, & leur faire les mesmes defenses portées dans ce Canon.

La 6. raison est, qu'il n'y a aucune des Bulles que les *Minimes* mettent en auant qui leur donne pouuoir de refuser l'entree de leur Eglise Conuentuelle au Curé de la Paroisse de saint Paul, au dedans de laquelle ils seront situés, & de luy fermer la porte d'icelle, lors qu'il y conduit les corps des decedez en la Paroisse, & de l'empescher d'y dire ou faire dire le *De profundis*, & *Requiescat in pace* tout haut; pour puis apres laisser aux *Minimes* acheuer l'inhumation desdits corps: veu que ces predecesseurs & luy l'ont tousiours pratiqué de la sorte depuis l'establissement des *Minimes* dans icelle Paroisse. De là il est aisé d'inferer que tout le scandale qui est arriué pour l'enterrement de ceux qui ont esleu leur sepulture en ce Conuent, ne procede que de la rebellion que les *Minimes* ont faite aux Ordonnances du sieur Official de Paris; & de ce qu'ils ont



violé leur foy & empesché l'effet de leur *Acte Capitulaire*, lequel pacifioit tous ces differens.

Et sert bien à ce subiet de demander aux *Minimes* pourquoy ils ont depuis peu empesché iceluy Curé, de conduire les corps de la *Damoiselle Janin*, & du sieur de la *Fayette*, iusques dans leur Eglise, apres auoir consenti & accordé par *Acte Capitulaire*, & par effet, que le Curé de saint Paul y entraist, comme il y est entré, avec ces Ecclesiastiques en conduisant les corps du petit *Conte d'Alais*, du petit de *Virry*, du sieur le *Lay*, & des Dames d'*Antrague*, & de la *Fosse*, & d'autres personnes de condition : car ils n'intendent point de procès pour enterrer les pauvres. Quel nouveau preiudice eut fait à leurs priuileges & exemptions le Curé de saint Paul en entrant dans leur Eglise ces deux dernieres fois, puis qu'ils auoient bien voulu qu'il y entraist en toutes les autres occasions sans nulle opposition?

Depuis quand ont-ils eu ce nouveau droit ou nouveau priuilege, & à qui l'ont-ils fait signifier? qui a iugé qu'ils pouuoient se releuer du Concordat fait avec le sieur *Fayet*, cy deuant Curé de S. Paul? Quelle sentence ou quel arrest est interuenu sur ce subiet, lequel ayt osté audit Curé la possession qu'il a tousiours eüe de conduire les corps iusques au milieu de leur Eglise? & quelle responce peuent ils faire, sinon qu'ils ont voulu que Paris veit, & toute l'Eglise recogneut qu'ils sont les plus violents & les plus rebelles de tous les Religieux.

Et qu'ainsi ne soit, si les *Minimes* auoient voulu la paix & eui-ter tous ces desordres, pourquoy n'attendoient-ils pas à enleuer & à enterrer le corps du sieur de la *Fayette* iusques aux sept heures du matin du iour suiuant, que la *Cour* auoit ordonné que les parties viendroient pour terminer ce different, & ce pendant que les choses demeureroient en estat. Iceluy Curé ne voulut pas aller enleuer ce corps, la *Cour* l'ayant deffendu : mais estant sommé le mesme iour sur les sept heures du soir de leuer iceluy corps, il y alla au mesme temps avec ses Ecclesiastiques, afin de tesmoigner qu'il estoit prest de mettre le corps en depost dans son Eglise ou autre, iusques au lendemain que la *Cour* deuoit en ordonner, & qu'il ne refusoit point de rendre au corps d'iceluy sieur de la *Fayette* les derniers deuoirs, comme il luy auoit rendu les premiers dans sa maladie.

Les *Minimes* bien loin de la voye dedouceur & de Paix ont enleué le corps avec violence dans vn carosse, environné de gens avec espées & pistolets, en presence d'iceluy Curé & de ses Prestres, au preiudice des deffenses de la *Cour*, & refuserent à iceluy Curé de receuoir ses oppositions & protestations, & le pousserent, avec tant de mespris de son caractere, & fermerent leur porte sur luy avec tant d'impetuosité qu'il resta grandement blessé à la main droite, & avec effusion de sang.

Les *Minimes* diront possible qu'ils n'ont pas enleué le corps du sieur de la *Fayette*, mais qu'ils l'ont receu, leur ayant esté apporté : comme si on pouuoit croire que la Dame de la *Fayette* eust fait de son mouuement cette faute, d'enleuer ou faire enleuer nuictamment le corps de son mary, sans Croix, sans Cierges, sans Estolle, sans l'assistance des Ecclesia-



liques, & sans les prieres & ceremonies accoustumées de l'Eglise, contre les deffences de la Cour, & la volonté de son Curé, & si elle l'a fait, on voit bien que ce n'a esté que par le conseil des *Minimes*, lesquels passent par dessus toutes sortes de loix & de coustumes, quand il s'agit de leurs interets: Mais quand les *Minimes* n'auroient fait autre faute que de recevoir ledit corps, sans qu'il leur fust présenté par iceluy Curé, c'est vne entreprise intolerable, vn mespris de la iurisdiction & autorité des Curez, & vn grand scandale dans le public.

Et n'est à propos de dire qu'on ne pouuoit dauantage garder le corps, n'y ayant pas vingt quatre heures qu'il estoit decedé, & estant dans vne biere de plomb, on l'eust encor facilement gardé huit ou neuf heures, qui estoit le temps que la Cour, par sa prudence, auoit arresté pour ordonner de quel sorte on en deuoit faire l'inhumation, & puis ledict Curé offroit de le mettre en depost en son Eglise, ou autre, iusques à ce que la Cour y eut pourueu. Mais les *Minimes* ayant tousiours fuy le iugement de cette affaire, comme ils font encor de present par des surprises & detours extraordinaires, ils ont mieux aimé violer le respect qu'ils doiuent à l'Eglise, & à la Iustice, enleuant le corps; que d'attendre l'Arrest de la Cour, preuoyant qu'il ne pouuoit estre rendu qu'à leur condamnation; & ce dans l'esperance qu'ils auoient que par leur puissantes intrigues & grande auctorité, ils euiteroient, ou du moins differeroient, comme ils font, pour longtemps la punition de cét entreprise, dont ils ne scauroient iamais recevoir que du desaduantage & de la confusion.

Car en effect ouyt on iamais dire qu'un corps puisse estre enléué, non pas mesme receu par des Religieux, s'il n'est présenté par son Curé; & le droit que les Pasteurs ont de mettre en terre les corps de leurs Parroissiens, est le dernier acte de iurisdiction qu'ils exercent sur eux; & les Parroissiens sont tellemēt astreints & obligez de recognoistre cette auctorité & iurisdiction appartenir à leur Curez, que si par la disposition des saincts Decrets quelqu'un eslieroit sa sepulture ailleurs qu'en la Parroisse, & qu'il legast quelque chose en l'Eglise, en laquelle il vouloit estre inhumé, il falloit donner à son Curé, en aucuns lieux la moitié, & en autres lieux le tiers de ce qu'il auoit legué par son testament, *Tertiam partem iudicii sui*, Leon III. l'ordonne ainsi au chap. 1. *De sepult.* & en rendit cette raison, *ut sint consolationum socii ut fuerint passionum*, & deffendit à tous Religieux & autres, à peine d'excommunication, d'inhumer les corps dans leur Couvents, qu'à ces conditions, *Alius inquit ne fiat auctoritate Domini nostri qui per Prophetam locutus dicens, ne transgrediaris terminos antiquos quos posuerunt patres tui sub anathematis vinculo detestamur & contradicimus*; Et la Glose in verb. *ne transgrediaris: transgreditur enim quis terminos proximi sui cum Parrochianum aliterius admittit ad sepulturam*. Mais enleuer vn corps à force d'armes en presence de son Curé, avec violences, iniures, menaces & autres excès sur la personne, & celle de ses Ecclesiastiques, contre les deffences de la Cour, & celles de Monsieur l'Archeuesque de Paris, contre la charité, *qua non insidiatur* contre la Iustice, contre la raison & contre toute sorte d'humanité, est vne chose si estrange & si extraordinaire,



que tous les bons Chrestiens en sont scandalisez?

La premiere cause de tous ces desordres vient de ce que les *Minimes* ne veulent plus recognoistre ny se soubmettre à la iurisdiction de Monsieur l'Archeuesque de Paris; bien qu'au commencement de leur establissement dedans la Parroisse de S. Paul, le Pere Chaillon ait présenté requête à Monsieur le Cardinal de Retz pour terminer tous les differêts qu'ils pouuoient auoir avec le sieur Fayet, lequel s'estoit opposé à leur establissement dedans la Parroisse; & en suite de la requête d'iceluy Pere Chaillon s'est ensuiuy l'ordonnance, & apres le Reglemēt du sieur Official de Paris, dont ils ont appellé comme de Iuge incompetent: De cette rebellion à leur Iuge naturel procedent toutes les voyes de fait & scādales qui sont arriuez aux inhumations, de ceux qui ont desiré estre enterrez chez eux.

Et ne sert rien de dire qu'ils ont des Bulles qui exemptent de la Iurisdiction des Euesques: car au plus elles ne peuuent s'estendre qu'à la direction interieure de leurs maisons Conuentuelles, de laquelle les Euesques se deschargent sur les Superieurs des Ordres; & non pas quand à l'administration des Sacremens, la predication de la parole de Dieu, & de toutes les autres fonctions Ecclesiastiques, dont l'Euesque doit estre le Iuge, selon le droit diuin & humain entre quelques personnes que ce soit, & particulièrement des differends qui arriuent pour les funerailles & inhumations des corps. Le Concile de Trente decide ainsi entierement ce poinct au ch. 13. sess. 25. *Controversias omnes, inquit, de pracedentia, quæ persape maximo cum scandalo oriuntur inter Ecclesiasticas personas, tam Seculares quam Regulares, cum in processionibus publicis, TVM IN HIS QVÆ FIVNT IN TVMV LANDIS DEFVNCTORVM CORPORIBVS* Episcopus amora omni appellatione, & non obstantibus quibuscunque componat.


D'où il s'ensuit que Monsieur l'Archeuesque de Paris ayant réglé les differends arriuez touchant les enterremens, entre les *Minimes* & le Curé de S. Paul, qu'ils ont deu s'y soubmettre à peine d'excommunication, pour la cōtrauention à ce Concile, & la rebellion à leur Euesque: Et que le Curé de S. Paul a eu & a raison d'insister, qu'iceluy Reglement soit obserué, nonobstant opposition ou appellation quelconque. Apres ce sacré Concile, dans lequel tout est si parfaitement défini par vne particuliere inspiration du Sainct Esprit, que l'on n'y peut ny adiouster ny diminuer; comment est ce que les *Minimes* osent dire & escrire qu'ils ne recognoissent en aucune chose Monsieur l'Archeuesque de Paris, & qu'ils ne se soubmettront point à ces ordonnances? Qu'ils lisent les autres Conciles & Canons, qu'ils lisent les Peres, qu'ils imitent les anciens Moines & Abbez; Et sans doute ils s'estonneront avec saint Bernard de leur desobeyssance; c'est en son Epistre 42. à l'Archeuesque de Sens, *Miror quosdam in nostro ordine Monasteriorum Abbates. hanc humilitatis regulam odiosa contentione infringere, & sub humili (quod peius est) habitu & tonsura tam superbe saperè, Ut cum ne unum quidem Verbulum de suis imperiis subditos pratergredi patiantur, ipsi propriis obedire contemnunt Episcopis, spoliant Ecclesias Ut emancipentur, redimunt se ne*



obediant: Non ita Christus, ille siquidem dedit vitam ne perderet obedientiam, qua isti  
 ut careant totum fere suum suorumq; victum expendunt. Quid hoc est praesumptionis,  
 o Monachi? SED NON PROPTER ME, IN QVIT  
 FACIO; SED QVÆRO ECCLESIAE LIBERTATEM.  
 O libertas omni (ut ita loquar) servitute servilior. Patienter ab huiusmodi libertate  
 abstineam quæ me pessime addicat superbia servituti, plus timeo dentes Lupi quam  
 virgam Pastoris. Certus sum ego Monachus & Monachorum qualiscunque  
 Abbas, si mei quandoque Pontificis à propriis cervicibus excutere iugum sentave-  
 ro, quod Satana, mox tyranni me ipsum subiciro.

Par ces moyens & autres qu'il plaira à la Cour, supplier de droit & de  
 equité, iceluy sieur Curé de saint Paul persiste és fins & conclusions de  
 sa Requête cydeuant rapportées.

*Monsieur du TILLET, Rapporteur  
 en la grande Chambre.*









I

**ORDONNANCE DE L'OFFICIAL DE**  
**Monsieur l'Archeuesque de Paris, au Curé de l'Eglise de**  
**S. Paul, qui estoit lors M<sup>re</sup>. ANTHOINE**  
**FAYET, enuoyée le 25. d'Aoust 1624.**




**L** EST M A N D E' par le grand Vicaire General  
soubz-signé de Monseigneur l'illustrissime & re-  
uerendissime Archeuesque de Paris, au Sieur Curé de  
l'Eglise de S. Paul de cette ville de Paris, ou son Vi-  
caire, de leuer le corps de defuncte Damoiselle d'Antal  
decedée en ladite paroisse depuis peu: & apres l'auoir  
conduit en ladite Eglise pour estre, present ledit corps,  
si c'est au matin, celebré vne grande Messe pour le remede & salut de l'ame  
de ladite defunte; Et si c'est l'apres - disné, dire Vespres des morts: apres  
conduire avec tel nombre de Prestres qu'il sera iugé à propos, le corps d'i-  
celle iusques à la nef de l'Eglise du conuent des Peres Minimes de la place  
Royale, où elle a esleu sa sepulture, sans faire par ledit Curé ou Vi-  
caire aucune harangue ou presentation ausdits Religieux; ains apres auoir  
chanté un de profundis ou Libera en la nef sur le corps, le retireront: Et le len-  
demain se celebrera vne grãde Messe ou seruice des morts au chœur de la-  
dite Eglise S. Paul, pour le remede de l'ame d'icelle deffunte, par tel nom-  
bre d'habituez qu'on aduifera. FAICT à Paris, ce 25. Aoust 1624.  
Signé, LE BLANC & LEGAY.

**ACTE CAPITVLAIRE DES MINIMES,**

president le Pere Oliuier CHAILLOV, en qualite de Correcteur, inseré en un  
ACTE de SIGNIFICATION & SOMMATION faicte le 24. d'Aoust  
1624. à leur requeste, par Toleron & Vigeon Notaires au Chastelet, en  
vertu de l'ordonnance sus-rapportée, & d'une Missiue du Sieur Of-  
ficial de Paris, enuoyées le mesme iour au Sieur FAYET lors Curé de l'Eglise de  
S. PAUL, à ce que par iceluy Sieur Curé, ou en son absence son Vicaire, il  
fût satisfait aux conditions y enoncées & qu'ils y acquiescoient & consen-  
toient, scauoir est à l'enleuement du corps à enterrer, à la conduite d'iceluy  
en l'Eglise de S. PAUL, par le Curé ou son Vicaire, avec son Clergé, ou tel  
nombre de Prestres qu'il sera aduifé, & apres la celebration du seruice ordonné  
par l'Eglise, qu'iceluy Sieur Curé, ou son Vicaire, & les Ecclesiastiques rap-  
portent le corps du d. funct, sans aucune harangue, & le posent dans leur  
Eglise Conuentuelle, & y chantent & disent le De profundis, & le Li-  
bera me Domine, ou telle autre priere qu'iceluy Curé leur aura ordonné.



**V**IOVRD'HVY les Notaires & garde-nottes du Roy  
nostre Sire en son Chastelet de Paris, sous-signez, obtemperants  
au requisitoire à eux fait de part des Correcteur, Religieux &  
Conuent des Minimes de la place Royale de cette ville de Paris, le





seroient transportez audit Conuent, au Chapitre duquel estants introduits & y trouuants lesdits Correcteur & Religieux capitulairement assemblez pour l'effect cy apres declaré, Auroit esté dit & declaré ausdits Notaires sous-signez, par le Reuerend & venerable Pere Frere Olivier CHAILLOV Correcteur dudit lieu & Conuent, pour tous les Religieux d'iceluy, que la Damoiselle femme du sieur Dantal demeurant rue neufue sainte Catherine proche ladite place Royale, seroit decedée le iour d'hier, vingt troisieme iour des present mois & an, laquelle auant son deceds, par vn escrit de sa main & sousigné de ces mots, *Louyse de Beaulieu*, la signature ordinaire dattée du vingtiesme iour de Iuillet dernier passé, en forme de Testament, auroit fait connoistre son intention estre, d'estre inhumée en l'Eglise dudit Conuent, au lieu designé par iceluy escrit, portant entre autres mots *suivant l'adieu que m'en a donné Monsieur nostre Curé de S. Paul*, & lequel escrit ledit Pere Correcteur és presences que dessus, auroit exhibé & communiqué, ensemble *une missiue* du sieur grand Vicaire de Monseigneur l'Archeuesque de Paris, souscrite de ces mots, *Vostre seruireur le Blanc*, qui l'auroit mise és mains de Venerable & discrete personne M Bernard Prestre, pour la faire tenir & presenter audit sieur Curé de S. Paul, & en laquelle missiue, de verité appert auoir esté obmis la superscription ou adresse à iceluy sieur Curé de S. Paul, dattée ce Samedy matin *vingtquatriesme iour du present mois d'Aoust*, le tout esdits Notaires sous-signez, portant ladite missiue, prie par ledit sieur grand Vicaire audit sieur Curé de S. Paul, de faciliter la sepulture du corps de ladite defuncte Damoiselle en ladite Eglise Conuentuelle desdits Peres Minimes aux conditions y mentionnées, *ausquelles conditions* lesdits Correcteur Religieux *unaniment* & d'une mesme voix & consentement ont dit vouloir obeir & acquiescer, & requis iceux Notaires sous-signez, se vouloir transporter vers ledit sieur Curé, ou pour son absence vers Maistre Iullien le Sueur son Vicaire, pour luy exhiber, lire & communiquer lesdits *escrit & missiue*, mesmes pour luy faire scauoir & declarer de leur part ledit *acquiescement* aux conditions de ladite missiue, & aduis dudit sieur grand Vicaire, porté par icelle, & conformement à icellesdites conditions, *consentants & accordants* lesdits Peres Correcteurs & Religieux que ledit sieur Curé de S. Paul ou son Vicaire & Ecclesiastiques apportent ledit corps mort sans aucune harangue, le posent dans leur dite Eglise Conuentuelle & chantent & disent le Pseaume *De profundis*, Respons, *Liberame Domine*, ou telle autre priere que ledit sieur Curé leur aura ordonné, pour ce fait laisser ausdits Religieux le susdit corps pour luy donner la sepulture au lieu & ainsi qu'il a esté requis & desiré par ladite Damoiselle Dantal. Auquel requisitoire desdits Religieux & Conuent, lesdits Notaires sous-signez satisfaisants & acquiesçans se seroient à l'instant transportez au Presbitere de ladite Eglise S. Paul. Et neantmoins afin de faire connoistre & faire scauoir veritablement audit sieur Curé la bonne & sainte intention desdits Correcteurs & Religieux touchant le fait & conditions cy dessus, en ladite missiue, *ils*



ont voulu & desiré signer le present acte. Ce fut fait & passé audit Chapitre d'iceluy *Conuent des Minimes* de la place Royale, l'an mil six cens vingt quatre, le vingt quatriesme iour d'Aoust apres midy. Et ont lesdits *Peres Chaillon* Correcteur, & *Religieux* signé la minutte des presentes, demeurée vers *Vigeon* l'un des Notaires soussignez. Auquel Presbiter de ladite Eglise *S. Paul* estants lesdits Notaires sous-signez, se seroient adressé audit Vicaire nommé en l'acte cy dessus, qui auroit dit & fait scauoir à iceux Notaires que ledit sieur Curé de *S. Paul* estoit pour lors absent de ceste dite ville de Paris, et apres luy auoir pour ladite absence dudit sieur Curé fait lecture, & communiqué lesdits escrit & missiue y mentionnez, auroit requis copie d'iceux escrit & missiue, mesme dudit present acte, pour faire voir & communiquer le tout audit sieur Curé & y faire telle responce par luy qu'il aduiera bon estre, & ce dans demain matin, & au surplus que ledit acte ne luy puisse nuire ny preiudicier. Fait & passé audit Presbiter de *S. Paul* lesdits iour, mois & an susdit, & heure de huiet heures de releuee, & a ledit le Sueur signé la minutte des presentes, estant en suite del'acte deuant escrit, demeuré comme direst vers ledit *Vigeon* Notaire. Signé, TOLON. VIGEON.

Acte du 25. Aoust 1624. contenant ce qui a esté fait  
en consequence de l'Acte Capitulaire, & de  
la sommation des Minimes.



VIOUR D'HYV datte des presentes, est comparu par-deuant les Notaires Gardenottes soussignez, *Maistre Christophle Petit*, Prestre, *Sous-Vicaire* de l'Eglise saint Paul, lequel a dit & déclaré, qu'en consequence desdites sommation, & des actes y enoncez & dattez, il vient de presentement, accompagné du Clergé de son Eglise de saint Paul, faire enleuer le corps de la Damoiselle *Dantal* nommée en ladite sommation, de la maison où elle demouroit rue neufue sainte Catherine, & iceluy conduit iusques en ladite Eglise saint Paul, où a esté dit sur le corps, les prieres ordinaires accoustumées estre dites pour les morts: ce fait conduit ledit corps avec ledit Clergé depuis ladite Eglise de saint Paul, iusques à l'Eglise des *Minimes* de la place Royale, lieu ordonné pour la sepulture d'icelle defuncte, & a entré en icelle Eglise avec sondit Clergé, & proche la fosse où elle a esté inhumée, sans luy auoir esté fait aucune resistance. Dont & dequoy il a requis Acte ausdits Notaires à luy octroyé le present pour luy seruir ce que de raison. Ce fut fait, deliuré, requis & octroyé au Presbiter de ladite Eglise saint Paul, au retour dudit conuoy, enuiron les huiet heures du soir, l'an 1624. le 25. iour d'Aoust. Et a signé,

PETIT. DV BOIS, & DV CHESNE.  
A ij



4

**PERMISSION DE L'OFFICIAL DE PARIS,**  
*donnée le 9. de Novembre 1624. aux parents*  
*de Maître Jean Placin.*



L est permis par le Blanc, Licentié ez Droicts, Chanoine & Archidiacre de Brie en l'Eglise de Paris, Official de Paris, Vicaire General de Monseigneur l'Illustrissime & Reuerendissime Archeuesque de Paris, aux parens de deffunt Maître Jean Placin, Secrétaire de la Chambre du Roy, de faire inhumer son corps en l'Eglise des Minimes de la place Royale à Paris, à condition que le corps sera porté en l'Eglise de saint Paul, paroisse en laquelle il est decédé, qu'en icelle seront faits les seruices, & tous droicts Curiaux & de Fabrique payez par les heritiers, & que les Prestres qui porteront son corps en ladite Eglise des Minimes entreront en icelle, sans aucune harangue aux Religieux. FAICT à Paris le 9. Novembre 1624.

Signé, LE BLANC, & LE GAY.

*Acte du 15. Novembre 1624. contenant ce qui a esté fait en*  
*consequence de la permission du sieur Official, touchant*  
*le conuoy & sepulture de Placin & Venot.*



T le 15. iour de Novembre ensuiuant, audit an 1624. auant midy, est comparu pardeuant les Notaires Gardenotes soubsignez & sus-nommez, ledit Maître Christophe Petit Souf-Vicaire sus-nommé, lequel a encore dit & déclaré que les 8. & 9. iours desdits presens mois & an, il a conduit avec le Clergé de ladite Eglise saint Paul les corps des deffuncts sieurs Venot & Placin, depuis ladite Eglise saint Paul iusqu'en l'Eglise des Minimes de la place Royale, lieu ordonné pour leurs sepultures, & a entré en ladite Eglise proche les fosses desdits deffuncts, sans luy auoir esté fait aucune resistance: dont & dequoy il a requis Acte ausdits Notaires, à luy octroyé pour seruir ce que de raison. Ce fut fait & passé en l'estude, &c. les an & iour susdits. Et a signé,

PETIT. DV BOIS, & DV CHESNE.

**EXTRAICT DES REGISTRES DES**  
*Conuois & Enterrements faits en l'Eglise de saint Paul*  
*à Paris, en l'an 1634.*



V LVNDY 18. de Decembre 1634. Conuoy general de feu Dame Louyse Rochon, veufue de feu Melsire Jean de la Fosse, viuant Conseiller du Roy en ses Conseils d'Estat & Priué, Surintendant General des Viures & Munitions aux Camps & Armées de France, prise rue Payene, & portée en l'Eglise de ceans, où on a chanté Vespres des Morts, puis portée en l'Egli,



sedes *Minimes* de la Place Royale, lieu de sa Sepulture, & posée par Monsieur le Curé au milieu de ladite Eglise, où il a entré sans faire nulle presentation, & a chanté le *De profundis* & *Requiescat in pace* sur le corps. Tout le luminaire a esté rapporté, tant torches que cierges, le tout du consentement desdits *Minimes*, chez Monsieur le Curé,

Fait & Collationné sur ledict Registre par moy soubs-signé, Vicairre d'icelle Eglise, le 22. iour d'Auril 1641. Signé, MORDANT, avec Paraphe.

## SENTENCE DE L'OFFICIAL DE PARIS,

donnée le 9. d'Auril 1639. portant Reglement entre les Curez de Paris, & les *Minimes* de la place Royale.



tous ceux qui ces presentes lettres verront, Denis le Blanc Prestre Licentié es Droicts, Chanoine & Archidiacre de Brie en l'Eglise de Paris, grand Vicairre de Monseigneur l'Illustrissime, & Reuerendissime Archeuesque de Paris, & Official de la Cour & iurisdiction Archiepiscopalle & Metropolitaine dudit lieu, Salut en nostre Seigneur; Sçauoir faisons, que au procès meü & pendant par deuant nous entre Maistre François L A V O C A T Docteur es droicts & Curé de l'Eglise parochialle de S. Paul à Paris, demandeur aux fins de la requeste par luy à Nous presentee le seiziesme iour du mois de Feurier dernier passé, Et Maistres Nicolas DESCLEVES, & Charles François TALON, Docteurs en Theologie de la faculté de Paris, & Curez des Eglises parochialles de S. Jean en Greue, & S. Geruais à Paris, interuenans esdits noms, d'une part; Et les Religieux & Conuent des Peres *Minimes* de la place Royale de ceste dite ville, defendeurs, d'autre part. Veu ladite requeste tendante afin que pour obuier aux entreprises pretendues faites par lesdits defendeurs en l'administration des Sacremens de Confession & Communion, dans les Oratoires & maisons particulieres aux Paroissiens de ladite Eglise saint Paul, estants tant en santé que maladie & autres entreprises sur les fonctions Curiales, mesmes pour le regard des Sepultures, & pour empescher à l'aduenir les differends qui pourront suruenir, Il nous pleust faire & rendre tel reiglement que nous aduiserions estre sur ce necessaire: Nostre ordonnance estant au pied de ladite requeste, par laquelle auroit esté dit qu'icelle requeste seroit communiquee, & d'icelle baillee coppie ausdits Religieux & Conuent pour en venir par le Superieur d'iceluy Conuent ou autre député par lesdits Religieux au lendemain pardeuant Nous: Exploit de signification desdites requeste & ordonnance, & assignation données ausdits defendeurs par Herue Notaire Apostolique, en datte dudit iour 16. Feburier dernier; A Fe de contestation & comparution faite pardeuant Nous par lesdits demandeur & interuenans en personne par Frere Nicolas Laissné Superieur dudit Conuent pour lesdits Religieux & Conuent le 17. dudit mois de Feurier dernier, contenant nostre ordonnance par laquelle auroit



esté dit que lesdits demandeurs & interuenans mettroient pardeuers Nous dans huitaine les articles des plaintes & demandes qu'ils entendoient proposer contre lesdits defendeurs pour estre communiquez & d'iceux baillé copie à iceux defendeurs, aux fins de par eux y respondre, & defendre dans huitaine apres: *Articles des demandes faites par lesdits demandeurs & interuenans, dont auroit esté baillé copie ausdits defendeurs le 3. iour du mois de Mars dernier passé: Acte iudiciaire du 17. dudit mois, par lequel auroit esté ordonné que lesdits defendeurs satisferoient à nostre appointment cy dessus, & ce faisant fourniroient ausdits demandeurs de responce & defences ausdites demandes & articles dans huitaine pour tout delay, alias & à faute de ce faire qu'ils en seroient forclos: Exploit de signification dudit appointment, faite ausdits defendeurs le 20. dudit mois de Mars dernier par ledit Heruë Notaire Apostolique: Autre acte du 24. du mesme mois par lequel à faute que lesdits defendeurs auroient fait de fournir de responce & defences ausdits articles à eux communiquez ils en auroient esté forclos, sauf si dans le premier iour heure d'audiance, pour toutes prefixions & delais, ils ne faisoient leurs diligences de ce faire, & en ce faisant ordonné que ledit temps passé il seroit procedé audit reglement requis par lesdits demandeur & interuenans, tant en presence qu'absence, & en outre fait droit sur les autres conclusions prises par le Promoteur de ceste Cour ainsi que de raison: Autre acte iudiciaire du Mefcredy 28. dudit mois de Mars, par lequel lesdits defendeurs auroient esté forclos & deboutez purement & simplement de fournir de responce & defences ausdits articles, & en ce faisant ordonné que lesdites demandes & articles & autres appointemens par Nous rendus seroient mis pardeuers Nous, avec ce que les parties voudroient escrire & produire dans le Lundy suiuant pour toutes prefixions & delais, & sans qu'il fut besoin d'autre forclusion ny signification de requeste pour estre par nous procedé audit reglement requis, & en outre fait droit sur les conclusions dudit Promoteur ainsi que de raison: Copie de requeste produite de la part desdits demandeurs & interuenans signee I. Baudouin, par laquelle se voit que dés l'onzième iour de Mars 1622. le Pere CHAILLOY lors Correcteur & Superieur dudit Conuent & les Religieux d'iceluy, auroient requis & supplié feu Monseigneur le Cardinal de RETS d'heureuse memoire, predecesseur de Mondit seigneur l'Archeuesque de Paris, que pour regler les differends qu'ils auoient eu avec Messire Antoine FAYET, nagueres Curé de ladite Eglise S. Paul, pour le fait des sepultures en l'Eglise dudit Conuent, il luy pleust faire tel reglement qu'il iugeroit estre necessaire pour le repos des parties, & pour entretenir la paix & bonne intelligence entr'eux, de laquelle requeste appert auoir esté baillé copie & communication audit FAYET le 18. dudit mois de Mars audit an 1622. par ledit Baudouin lors Secretaire de l'Archeuesché de Paris, suiuant l'ordonnancé dudit feu sieur Cardinal: Copie de certain reglement fait entre ledit Curé de S. Paul & les Religieux du petit S. Antoine de Paris, en date du 16. Mars mil trois cens soixante & cinq: Production desdits demandeurs & interuenans, & apres que lesdits*



defendeurs n'ont produit aucune chose de leur part, dont ils ont esté forclos & deboutez; Et *Conclusions* dudit Promoteur, tout considéré, le nom de Dieu inuocé, & eu sur ce conseil, **NOVS VICAIRE GENERAL ET OFFICIAL** susdit faisant droit tant sur les *demandes* desdits demandeurs & interuenants, que sur les *conclusions* dudit Promoteur auons réglé & ordonné ce qui ensuit.

**PREMIEREMENT**, Que lesdits Religieux & Conuent des *Minimes* comme estants situez dans le destroit & limites de ladite Paroisse de S. Paul, feront & garderont tous les ans en leurdite Eglise & Conuent, les *solemnitez* des festes des Patrons de ladite Eglise, sçauoir est, de S. Pierre le 29. iour de Iuin, de la Commemoration de S. Paul le 30. du mesme mois de Iuin, & de la Conuersion de S. Paul le 25. iour du mois de Ianuier.

2. Item est permis & loisible audit *Curé de S. Paul* & ses successeurs d'administrer les *Sacremens* dependants de sa fonction à ses Paroissiens seulement, & celebrer la sainte Messe en l'une des Chappelles de l'Eglise dudit Conuent, sans qu'iceux *Religieux & Conuent* l'en puissent empescher ny pretendre aucuns droits desdits Curé & Paroissiens pour ce regard, en aduertissant neantmoins au prealable lesdits Religieux.

3. Et arriuant que quelques Paroissiens de ladite *Eglise S. Paul* par leurs Testaments ou declaration de leur derniere volonté faite en presence de personnes dignes de foy, eussent leurs *sepultures* en l'Eglise du Conuent, seront les corps d'iceux defuncts conduits par ledit Curé de S. Paul ou son *Vicaire, & Prestres habituez* en l'Eglise dudit Conuent, sans que lesdits Curé ou Vicaire soient tenus faire aucune *presentation* desdits corps ausdits Religieux *à l'entree* de la porte de ladite Eglise, ains leur sera loisible d'entrer avec lesdits Prestres & habituez *en la nef d'icelle* Eglise & au milieu d'icelle, faire mettre & reposer lesdits corps, sur lesquels apres auoir fait chanter le *Psalme De profundis*, & oraisons accoustumées, ils se retireront & laisseront faire ausdits Religieux le surplus de la sepulture; apres les ceremonies de laquelle, appartiendra & sera pris par ledit Curé tout le luminaire, tant qui aura esté porté audit conuoy que celui qui sera autour desdits corps, sans que lesdits Religieux y puissent pretendre aucune chose, fors & reserué que si lesdits Religieux ont assisté audit conuoy les deux torches que deux d'iceux Religieux auront porté à costé de leur Croix, appartiendra audit Conuent.

4. Item pour la reconnoissance des droits Parochiaux requise par ledit Curé de S. Paul pour estre ledit Conuent basti dans le destroit & limites de sa Paroisse, & pour la place qu'ils y occupent à present, ensemble pour les offrandes qui pourroient estre faites cy après aux *sepultures* des Paroissiens de ladite Eglise S. Paul en celle dudit Conuent, Auons ordonné qu'il sera payé audit Curé & ses successeurs par lesdits Religieux & Conuent la somme de vingt liures tournois par chacun an ledit iour & feste de la Commemoration de saint Paul 30. de Iuin.

5. Et toutesfois & quantes que ledit Curé aura deuotion de mener la *Procession* de la Paroisse vne fois l'annee ou plusieurs, en l'Eglise dudit Conuent.



Iuy sera loisible de ce faire, sans que lesdits Religieux s'en puissent empêcher, ny d'y celebrer la *Messe de la Procession* au grand *Autel*, en aduertissant toutesfois le iour precedent le Superieur dudit Conuent, afin que le seruice ordinaire & Conuentuel ne soit troublé & empêché: & lors que en ladite Procession seront portees les saintes *Reliques* lesdits Religieux seront tenus de se presenter à la porte pour la reuerence d'icelles, avec *cierges* & *encens*.

6. Et outre, lors que la *Procession du saint Sacrement* de ladite Eglise S. Paul passera pardeuant l'Eglise dudit Conuent, en seront lesdits Religieux aduertis le iour precedent par ledit Curé ou Marguilliers de ladite Eglise S. Paul, afin que lesdits Religieux aient à se trouuer *en corps* à l'entree de la porte dudit Conuent avec la *Croix*, chandeliers, *cierges*, & *encensoirs* pour encenser le S. Sacrement, pour la reuerence d'iceluy lors qu'il passera, & ce conformément au deuoir & louable coustume obseruee en toutes les Eglises de ceste ville & faux bourgs.

7. Item les questes des *aumônes* de charité qui ont accoustumé de se faire en ladite Eglise S. Paul, & qui seront permises, pourront estre faites en ladite Eglise dudit Conuent, par les personnes qui seront deputées pour ce faire par ledit Curé & Marguilliers de ladite Paroisse S. Paul, sans que lesdits Religieux le puissent empêcher, pouruen que ce soit en lieu commode, sans que la *Predication* & seruice diuin de l'Eglise dudit Conuent en soit troublé, & ne se pourra faire d'autres questes en l'Eglise d'iceluy Conuent sans la permission particuliere de Monseigneur l'Archeuesque de Paris ou de ses Vicaires generaux.

8. Et lors que lesdits Religieux feront pour eux & leur Conuent la *benediction des cierges* le iour de la Purification de nostre Dame, & des Cendres le premier iour de Carême, & des *Palmes* & *Rameaux* le Dimanche des Rameaux, ils n'en feront faire n'y permettront estre faite aucune distribution au peuple de la Paroisse de S. Paul, ny à d'autres, ny mesmes aucune benediction, ny distribution de *pain benit*, & ne pourront faire aucune autre fonction Curiale en leur dite Eglise, ny ailleurs.

9. Comme aussi ne sera loisible, ains auons tres-expressement defendu ausdits Religieux & Conuent, de faire aucune benediction de *femmes grosses*, auant ny apres leur accouchement, ny aucunes prieres ny ceremonies mentionnées dans le Rituel & Manuel de ce Diocese, soit en l'Eglise dudit Conuent, ny és Oratoires ou Chapelles & maisons particulieres de ceste ville & Diocese de Paris.

10. Ne pourront aussi lesdits Religieux, & leur auons fait pareilles defences d'admettre aucunes personnes tant desdites Paroisses de S. Paul, S. Geruais, & S. Iean, que d'autres Paroisses, aux *Sacrements* de Penitence & Communion, en leur dite Eglise & Conuent, ny ailleurs, *durant la quinzaine de Pasques*, à commencer du Dimanche des Rameaux iusques au lendemain du Dimanche *in albis*, vulgairement appellé *Quasmodo*, conformément aux saints Decrets, constitutions Canoniques, statuts & reglemens de ce Diocese & intention de Mondit seigneur l'Archeuesque, sans l'expresse permission par escrit d'iceluy ou desdits Curez.



11. Comme pareillement d'administrer lesdits Sacraments es maisons, Chapelles & Oratoires particulieres à personnes saines & estants en bonne disposition, sans l'expresse permission par escrit de Monseigneur l'Archeuesque, ou desdits Curez.

12. Et pour le regard des malades, auons fait pareilles defences ausdits Religieux, de leur administrer les Sacraments de Penitence esdites maisons & Chapelles, ou Oratoires particulieres, sans la permission desdits Curez, & qu'auparauant iceux Curez ou leurs Vicaires ayent esté aduertis par lesdits Religieux, ou de la part desdits malades, ou à tout le moins apres lesdites Confessions en cas de necessité & qu'il n'y eust loisir ny commodité d'en donner l'aduertissement auparauant, & non autrement, sans qu'iceux Religieux puissent en quelque façon que ce soit administrer le Sacrement de Communion ausdits malades, si ce n'est par expresse permission par escrit de Mondit seigneur l'Archeuesque, ou consentement expres desdits Curez.

Et sera nostre present Reglement inuiolablement obserué, entretenu, & gardé de point en point selon la forme & teneur, sans y contreuenir & sans despens de la presente instance, attendu la qualité des parties. En foy dequoy nous auons à ces presentes fait mettre & apposer le contresel de ladite Cour Archiepiscopale de Paris. Ce fut fait, donné & prononcé par nous Vicaire general & Official susdit, en l'Auditoire de ladite Cour Archiepiscopale, en presence de M. Pierre le Gay, & Thomas Gallot, Procureurs desdits demandeurs & interuenans, & en l'absence desdits defendeurs, le lundy 9. iour du mois d'Auril 1629. Ainsi signé en la minute des presentes,  
LE BLANC.  
Le Vasseur.

L'An mil six cens vingt-neuf, le Mercredy vnzieme iour d'Auril apres midy, la sentence cy-dessus escrete a esté monstrée & signifiée ausdits Religieux Minimes de la place Royale, y denommez, en parlant pour eux à frere Nicolas Laisné, Religieux dudit Ordre & Correcteur dudit Couuent, à ce qu'ils n'en pretendent cause d'ignorance, auquel parlant i'ay laissé copie, tant de ladite sentence que de mon exploit de signification es presences de Nicolas le Preux & Jean Fagots & plusieurs autres tesmoins à ce requis & appelez. Signé,

HERVE, Notaire.



SENTENCE DE L'OFFICIAL DE PARIS,  
donnée le 20. d'Octobre 1640.



N la cause appellée iudiciairement deuant nous Denis le Blanc, Prestre docteur es Droicts, Chanoine & Archidiaque de Brie en l'Eglise de Paris, Grand-Vicaire de Monseigneur l'Ilustrissime & reuerendissime Archeuesque de Paris, & Official de la Cour & Iurisdiction Archiepiscopalle & Metropolitaine dudit lieu. Entre Mre Nicolas Mazure Prestre Docteur en Theologie, Curé de l'Eglise Parochiale de S. Paul de cette ville, demandeur aux fins de la requeste du vuziesme Septembre dernier, comparant par Maistre René Terriere son Procureur d'une part; Et les Religieux Minimes de la Place Royale de cette ville de Paris defendeurs & defaillants, d'autre.

Nous Official susdict, lecture à nous faicte des *Sentences* rendues aux requestes du Palais le treiziesme & dix-septiesme des presens mois & an, signifiées ausdicts defendeurs, portants renuoy par deuant nous de l'instance intentée en cette Cour par ledict demandeur alencontre desdicts defendeurs, la derniere d'icelles sentences portant qu'elle sera executée nonobstant appel ny oppositions ou appellations quelcōques, & sans preiudicier à icelles. Ouy sur ce le Promoteur, auons audit Terriere ce requérant audit nom donné & donnons quatriesme défaut contre lesdits defendeurs, non comparants, ny Procureur pour eux, pour le profit duquel AVONS ordonné & ordonnons que le *Reglement*, par nous fait entre lesdictes parties, le neuuesme d'Auril mil six cens vingt-neuf, sera executé selon la forme & teneur: Et ce faisant, auons faict & faisons tres-expreses inhibitions & defences ausdits defendeurs d'entreprendre à l'aduenir de recevoir & admettre à la sepulture en leur Eglise, aucuns corps des defuncts Paroissiens de ladite Eglise saint Paul, sans qu'au preallable lesdicts corps soient leuez par ledict demandeur ou ses Vicaires, & par luy ou lesdicts Vicaires & Prestres conduits iusques en la nef de leur dite Eglise, ainsi quil est porté par ledict *Reglement*. Et auons iceux defendeurs condamnez à restituer audit demandeur le luminare & autres droicts à luy appartenants, par eux receus de l'enterrement du corps de la fille du sieur Iannin de Castille, dont est question: Et pour auoir par eux contreuenue à nostredit *Reglement*, & entrepris de recevoir ledict corps, transporté en leur Eglise dans un caroce, sans aucune des ceremonies de l'Eglise, en tel cas requises, les auons condamnez en la somme de vingt liures, applicables à l'Oeuvre & Fabrique de ladite Eglise saint Paul, & aux despens. Et pour ladite execution des presentes, si besoin est, auons permis & permettons audit demandeur implorer l'aide du bras Seculier. Fait au Pretoire de l'Officialité de Paris, par nous Official susdit, l'Audience tenant les an & iour que dessus. Signé,

HVBERT.



**L**ES an & iour que dessus fut la presente Sentence signifiée, deuëment  
faict à sçauoir, & d'icelle baillé copie ausdits Religieux Minimes  
de la place Royale de cette ville de Paris, à ce que du contenu en icelle ils  
n'en pretendent cause d'ignorance, en parlant pour eux à Frere Henry  
Deschamps, Portier dudict Conuent, audict Conuent par moy Appari-  
teur es Cours Ecclesiastiques à Paris soubs-signé, & leur ay laissé aultant  
de mon present exploit, en presence de Pierre le Gay, Mathurin Rou-  
nelin, & autres tesmoins. Signé,

COLLOMBIER.

## ORDONNANCE DE L'OFFICIAL DE PARIS,

*sur Requête presentee par M<sup>re</sup> Nicolas Mazure le 8.*

*d'Auail 1641. au subiect du Conuoy & enterre-  
ment du sieur de la FAYETE.*

**S**VPPLIE humblement Nicolas Mazure Prestre, Docteur  
de Sorbonne, & Curé del'Eglise parochiale de saint Paul,  
DISANT qu'ayant esté aduerti du decés du sieur de la Fayette  
gentilhomme de Monsieur le Marechal de Vitry, & que par  
la disposition derniere de sa volonté il auoit esleu sa sepulture dans l'Egli-  
se des Freres Minimes, il requiert qu'il vous plaise ordonner en conse-  
quence de vostre Reglement entre les Minimes & luy appellant, & autres  
Sentences confirmatiues d'iceluy, qu'apres auoir par luy leué le corps  
dudit sieur de la Fayette, l'auoir conduit dans ladite Eglise de saint Paul,  
& en icelle faict Seruice sur ledit corps, il conduira ledit corps avec ses  
Ecclesiastiques iusques dans le milieu de la Nef de l'Eglise desdits Minimes,  
sans harangue ny presentation, ainsi que vous auez ordonné plusieurs  
fois en pareilles rencontres: Et en cas de contrauention de la part desdits  
Minimes & de refus, ordonner que ledit corps sera inhumé dedans ladite  
Eglise de saint Paul, ou du moins mis en deposal dans l'une des caues de  
ladite Eglise de saint Paul, iusques à ce qu'il en soit autrement ordonné:  
Et vous ferez iustice. Signé, MAZURE.

VEV NOSTRE REGLEMENT, & ayant esgard à la Requête cy-dessus,  
Nous auons ordonné que le suppliant avec les Ecclesiastiques habitez de son  
Eglise de S. Paul, leuera le corps du feu sieur de la Fayette denommé par la-  
dite Requête, & apres auoir iceluy conduit & mené en ladite Eglise & fait  
& celebré le Seruice en presence dudit corps, l'assister & conduire avec les-  
dits Ecclesiastiques, iusques au milieu de la Nef de l'Eglise des Peres Mini-  
mes de la place Royale, sise en ladicte Paroisse S. Paul, & apres auoir par  
ledit suppliant & ses Ecclesiastiques chanté vn *De profundis* & oraisons  
accoustumées pour les morts, laisser ledit corps pour inhumér ausdits Pe-  
res Minimes en leur Eglise, sans faire, par lesdits appellans aucune pre-  
sentation ausdits Religieux à l'entree de leur Eglise, conformément &  
pour les causes portées par ledit Reglement: Et en cas de contrauention



par lesdits Religieux, & qu'ils ne veillent souffrir que le suppliant satisfait  
face à ce que dessus, Nous luy auons permis & permettons de remener  
& reconduire ledit corps en ladite Eglise de saint Paul, & iceluy corps  
faire mettre en depost en quelqu'une des caues de ladite Eglise ou Chap-  
pelles d'icelle, iusques à ce qu'autrement en ait esté ordonné avec lesdits  
Religieux & autres qu'il appartiendra: Ce qui sera executé nonobstant  
toutes oppositions ou appellations quelconques & sans preiudice d'icel-  
les. Et à cette fin permis si besoin est, d'implorer l'aide du Bras seculier.  
FAICT à Paris par nous soubsigné Vicair General & Official de Mon-  
seigneur l'illustrissime & reuerendissime Archeuesque de Paris, le lundy  
8. iour d'Auil 1641. apres midy. Signé, LE BLANC.



73

REQUESTE PRESENTÉE A LA COVR PAR

M<sup>re</sup> Nicolas Mazure Curé de S. PAUL, le 9. Auril 1641.

ORDONNANCE ET DEFENSES DE LA COVR ET  
ACTE de signification & copie baillée aux Minimes, en leur Con-  
uent, & defences à eux faictes suivant l'Ordonnance de la Cour  
du mesme iour 9. d' Auril.

A NOSSEIGNEURS DE PARLEMENT.

**S**UPPLIE humblement Nicolas Mazure Prestre Docteur en  
Theologie de la maison de Sorbonne & Curé de l'Eglise Pa-  
rochiale de S. Paul, DISANT qu'il a présenté sa requeste à la  
Cour contre les Minimes, pour estre reglez sur la possession, en  
laquelle il est, tant pour les sepultures qui se font dans l'Eglise  
desdits Religieux, qu'autres droicts Curiaux, et quels il est troublé par eux:  
sur laquelle Monsieur Philippeaux Conseiller en ladite Cour ayant esté  
commis pour Regler les parties, lesdits Religieux, quelque diligence  
qu'ayt faicte le suppliant pour les faire deffendre à icelle, il n'a pas peu en  
auoir raison: Cependant il est arriué le deceds du sieur de la Fayette decédé  
dans ladite Paroisse de S. Paul, & a eu le suppliant aduis que par la dispo-  
sition de sa derniere volonté, il auoit esleu sa sepulture dans l'Eglise des  
Minimes, & que lesdits Minimes pretendent enleuer ledit corps sans l'or-  
dre & conduite du suppliant, & de son clergé, ainsi qu'ils ont desia fait &  
dont le suppliant s'est plaint. CE CONSIDERE', Nossseigneurs, IL VOVS  
PLAISE, ordonner que ledit Testament, ou extrait de l'article d'iceluy,  
portant disposition de ladite inhumation, sera communiqué au suppliant en  
forme; & que ledit suppliant avec ses Ecclesiastiques, en cas que ledit  
deffunct ayt ainsi testé, cōduira ledit Corps iusques dans lanef de l'Eglise  
desdits Minimes, sans Harangue ny presentation, ainsi que le suppliant &  
ses predecesseurs ont fait depuis l'establissement desdits Minimes, comme  
il appert par les actes cy attachez, & le consentement capitulaire de tous les-  
dits Religieux, signifié au predecesseur du suppliant, à la requeste d'iceux  
Minimes, & par les Reglemens rendus en semblable rencontre, tant par la  
Cour quel' Official de Paris, entre lesdits Minimes, le suppliant & ses pre-  
decesseurs; sinon & en cas que la Cour veille estre plus amplement in-  
formée & pour euitier au grand scandale qui pourroit arriuer de la  
part desdits Minimes, ordonner que ledit corps sera inhumé dans ladicte  
Eglise de S. Paul, ou du moins qu'il demeurera en depost dans l'une des  
Chapelles d'icelle Eglise, iusques à ce que par la Cour ayt esté pourueu.  
Et vous ferez bien. Signé, MAZURE. PAGEAU.

Viennent les parties demain sept heures du matin, les choses demeurants en  
estat. Fait en Parlement le 9. Auril 1641.

L'AN & IOVR cy-dessus, fut la presente signifiée & dicelle baillée co-  
pie à M<sup>re</sup> P<sup>re</sup>ault Procureur de partie aduerso. Signé, LANGLOIS.



Et ledit Iour 9. d'Avril 1641. fut aussi ladite requeste signifiée & d'icelle baillé copie, ensemble de la presente signification, ausdits Religieux Minimes de la place Royale, en leur maison & domicile en la place Royale, en parlât pour eux à Frere Marcelle Duc Religieux portier; Et à eux enjoint de cōparoir demain sept heures du matin en la grande Chābre de ladite Cour, pardevant Nosseigneurs tenants icelle, pour respondre aux fins de ladite requeste, & en outre ainsi que de raison: Et à eux fait les deffences, ordonnées par ladite Cour. FAICT par moy Huissier en icelle soubssigné. Signé,  
LANGLOIS.

**ACTE DE SOMMATION ET PROTESTATION**  
faictes à 7. heures du soir, le 9. d'Avril 1641. sous un nom  
emprunté par les Minimes.



LA Requeste de haute & puissante Dame, Dame Lucrece Boyer, femme espouse de Monseigneur le Marechal de Vitry,

Soit signifié, déclaré & deuëment fait à sçauoir à Curé de l'Eglise Paroissiale de Monsieur saint Paul, à Paris, qu'il ait à presentement se transporter en l'Hostel de Vitry, auquel lieu est decedé le iour d'hier huitiesme des present mois & an, deux heures apres midy, fleur de la Fayette, pour presentement conduire en l'Eglise des Minimes le corps dudit defunct, suiuant & au desir du testament & derniere volonté dudit defunct, luy declarant qu'à faulte de ce faire ladite Dame fera presentement enleuer ledict corps par les Peres Minimes, à ce qu'il n'en pretende cause d'ignorance.

FAICT ces sommation & protestation cy-dessus, par moy Sergent à verge au Chastellet de Paris, soubssigné audit fleur Curé de saint Paul, y nommé, en parlant à Michel Payen, son domestique & plusieurs autres, à ce qu'il n'en pretende cause d'ignorance, aux protestations cy-dessus, le 9. Avril 1641. present ces tesmoins nommez en mon original, le 9. Avril sur les sept heures du soir. Signé, MILLET.

**PROCES VERBAL:**

**SVR LA PLAINTÉ FAICTE PAR M<sup>re</sup>. NICOLAS MAZURE** Curé de l'Eglise de S. PAUL au Commissaire Fizeau  
le 9. Avril 1641. enuiron les 8. heures du soir.



LE MARDY 9. iour d'AVRIL 1641. enuiron les 8. heures du soir, Est venu pardeuers & en l'hostel de nous Charles FIZEAU Commissaire Examineur au Chastelet de Paris, noble & scientifique personne M<sup>re</sup> Nicolas Mazure Prestre Docteur en la sainte Faculté de Theologie, Curé de l'Eglise & Paroisse de S. PAUL à Paris, qui a fait



*plainte, & di& que le iour d'hier de releuée le sieur Jean du Bois sieur de la Fayette* gouverneur des Enfans de M<sup>o</sup>seigneur le Marechal de Vitry, estât decedé en l'Hostel de Vitry, derriere la place Royale, & ayât eu aduis des parens dudit *la Fayette*, que par son testamēt il auoit declaré son corps estre inhumé en l'Eglise des *Minimes* place Royale, & ayant esté ledit sieur Cōplaignant requis d'agreer ladite sepulture en ladicte Eglise, & encores que l'on ne luy eust fait veoir le testament dudit deffunct, neantmoins il auoit accordé de cōduire avec ses Ecclesiastiques le corps ainsi qu'il est de coustume, pourueu que lesdits *Minimes* le laissassent entrer avec son Clergé iusques au milieu de leur Eglise pour y chanter le *Deprofundis*, ainsi qu'il s'est practiqué cy-deuant, pres des corps que ledit sieur Complaignant a conduits dans ladite Eglise, mais ayant apprins que lesdits Religieux *Minimes* se resoluient d'empescher audit sieur Complaignant & à son Clergé, l'entrée en leurdicte Eglise il auoit ce iourd'huy présenté requeste à la Cour afin d'estre reglez sur ce faict, sur laquelle la Cour ayant ordonné que les parties en viendroient à demain sept heures du matin en la Chambre, & cependant que toutes choses demeureroient en estat, Ledit sieur Complaignant auoit fait signifier ladicte Ordonnance dès ce iourd'huy *une heure* de releuée, non seulement à Pijault Procureur desdits Religieux *Minimes*, mais aussi à iceux *Minimes* en leur Monastere par Maistre Langlois Huissier en ladicte Cour, lequel par son exploit leur auoit enioinct suiuant l'Ordonnance de la Cour, de comparoir le lendemain sept heures du matin en la Cour pour respondre aux fins de ladicte requeste & en outre à telles fins que de raison, & à eux faict les deffences portées par dicte Ordonnance de la Cour: au preiudice de quoy & par vn attentat insigne contre l'autorité du Roy & de la Cour ainsi que contre le droit diuin & les saincts Decrets & Canons & contre la discipline & Hierarchie de l'Eglise, lesdits Religieux *Minimes* sur les sept heures du soir de ce mesme iour n'enfielme d'Auril, auoient fait sommer & declarer audit sieur Complaignant par Miller, soy disant sergent à verge au Chastellet de Paris, qu'il eust à se transporter presentement, en l'hostel de Vitry pour presentement conduire en l'Eglise des *Minimes* ledit corps, & à fante de ce faire par luy que presentement ledit corps seroit enleué par eux *Minimes*, lesquelles sommation & declaration ayant esté faicte en parlant à Michel Payen son domestique sur les sept heures du soir, ainsi que porte mesme l'exploict dudit Miller, Ledit Payen luy en ayant à l'instant donné aduis, il se seroit aussi tost acheminé & transporté audit Hostel de Vitry, accompagné de six Ecclesiastiques Prestres habitez en ladicte Eglise, & estant arriué pres ledit Hostel il auoit veu que l'on mettoit le corps dudit deffunct dans un caroce pour le conduire en ladicte Eglise des *Minimes*: Ce qui luy auoit donné subiect de dire & declarer hautement qu'il s'opposoit à ce que ledit corps fut ainsi transporté, & qu'il estoit tout prest de le conduire, comme il auoit accoustumé d'estre faict en pareil subiect dans l'Eglise de S. Paul pour y faire pour l'ame dudit deffunct les prieres de l'Eglise accoustumées & de là le reconduire en l'Eglise desdits Religieux *Minimes*, & de ladicte opposition & de ses dire & declaration auoit demandé acte à Maistres Pierre Fieffé & Guillaume du Chesne No-



taires qui y estoient presents & qu'il auoit requis de venir avec luy, sur ce qu'il auoit veu & reconnu par les termes de ladite sommation qu'outre la contrauention & le mespris que lesdits Religieux *Minimes* entreprenoient de faire contre l'Ordonnance de ladite Cour, ils voudroient vser de voyes extraordinaires, dont il luy seroit besoin d'auoir acte par Notaires, mais nonobstant ce que le Complainant ait peu dire & declarer, ceux qui conduisoient ledit corps, n'ont pas delaisié de faire auancer le *caroce* & le faire arriuer à la porte de la court deuant l'Eglise desdits *Minimes*, dans laquelle court estoient plusieurs Religieux dudit ordre avec cierges ardants en leurs mains, les aucuns vestus de Rochets & Chappes, attendans ledit corps lequel ayant esté tiré du *caroce* & porté dans l'Eglise, ledit sieur Complainant auoit suivi avec lesdits Prestres habituez en ladite Eglise ledit corps, & si tost qu'il fut entré en icelle lesdits Religieux *fermerent les portes & enfermerent* tant luy que lesdits Ecclesiastiques, & quelques autres personnes seculieres, qui y estoient entrez, sans vouloir par lesdits Religieux permettre que lesdits Notaires entraissent; Et cōme il insistoit pour faire entrer lesdits Notaires affin qu'ils luy donnassent acte de ce qui se passoit, quelques vns desdits Religieux dirent qu'ils n'entreroient point, & qu'il estoit bien impudent qu'il n'auoit point de droit sur ce corps, & qu'il leur appartenait; Et leur ayant demandé à sortir, ils respondirent qu'il ne sortiroit point par la mesme porte par où il estoit entré; ne voulant aussi que les Notaires qui estoient à cette porte luy donnassent acte de leur violences, entreprises, attentat & voyes de fait, ainsi que de la contrauention qu'ils faisoient aux deffences de la Cour à eux signifiées; Et enfin lesdits Religieux ayant ouuert vne autre des portes de leur Eglise, ils le necessiterent & forcerent de sortir par icelle, & comme il sortoit quelques vns d'être eux le poussèrent avec telle violence que par plusieurs fois il fut prest de tōber, & estāt entre ladicte porte pour sortir ils fermerēt icelle porte en sorte qu'ils luy *enfermerent LA MAIN droite* & avec telle violence qu'ils l'ē ont *BLESSE au poignet* & y a eu de son SANG ESPANDU, desquels *attentats & violences, entreprises, excetz, voyes de fait*, atroces iniures & blesseure, laquelle blesseure ledict sieur complainant nous a fait veoir avec sa MAIN encore toute ENSANGLANTÉE, sur laquelle mesme en nostre presence a esté mis le premier appareil, iceluy sieur complainant nous a requis recevoir sa presente plainte pour en estre informé, & autrement luy seruir ainsi que de raison. SUR QUOY, ouy ladite plainte que nous auons receuë & VEU la main DROITE dudit sieur complainant qu'il auoit blessée au dessus du poignet, estant encore PLEINE DE SANG, qui decouloit de la playe, nous auons à iceluy sieur complainant donné Acte de ladite plainte, pour luy seruir & valoir en temps & lieu ce que de raison; Et à luy dit, que sur l'Information par luy requise, il eut à se pourueoir par deuant Nosseigneurs de Parlement, attendu qu'il leur auoit ja présenté sa Requête: Et à cette fin à luy deliuré ce present nostre proces Verbal, les an & jour dessusdicts. Signé, FIZEAV.



# CERTIFICAT DV SIEVR DE LA VIGNE

Docteur en Medecine de la Faculté de Paris, sur la blessure

auec effusion de sang de M<sup>re</sup> Nicolas Mazure Curé

de saint Paul.

**E**GO in saluberrima Facultate Parisiensi Doctor Medicus, omnibus ac singulis, quorum interest, notum facio, me hodierna die inuississe, in ædibus suis, piissimum & sapientissimum virum, Dominum N. MAZURE Ecclesiæ D. PAVLI pastorem ac rectorē vigilantissimū, nec non in sacra Theologiæ Facultate Doctorem meritiſſimum, &c. de dolore *dextrae manus* conquerentem: in quā quidem ad inferiorem & interiorem partem carpi, & supernam metacarpi, quæ minimum digitum respicit, *contusionem dolorificam* deprehendi, unā cum *exulceratione* recenti *nec leui*, à quā manauit *sanguis*, & prædicti metacarpi ac digitorum manus ipsius stupore quodam: hæc autem omnia non aliunde, meo quidem iudicio, proficisci potuere, quā à causa aliqua externa dura collidente, contundente & violenter comprimente. In cuius rei fidem chirographum meum hîc apposui, die 10. mensis Aprilis, anno Domini 1641. Signé, DE LA VIGNE.

## CERTIFICAT DE GENDRON ET BERTRAND

Maitres Chirurgiens à Paris, sur la blessure auec effusion

de sang du sieur Curé de saint Paul.

**N**OUS soubz-signez Maitres Chirurgiens à Paris, apres auoir veu & visité la *playe* & contusion mentionnée au present *Certificat*, cy-dessus escrit, auons trouué iceluy estre *vray*, tesmoins nos seings cy mis le 10. iour d'Auril 1641. Signé, GENDRON, & BERTRAND.

## REQUESTE PRESENTÉE A LA COVR

par M<sup>re</sup> Nicolas Mazure, Curé de saint PAVL.

le 10. d'Auril 1641.

## A Nosseigneurs tenants la Cour de Parlement.

**S**UPPLIE humblement Nicolas Mazure Prestre Docteur en Theologie de la Faculté de Paris & maison de Sorbonne, & Curé de l'Eglise Parrochiale de S. Paul, DISANT que le iour d'hier (qui estoit le 9. de ce mois d'Auril) il auroit présenté requête à la Cour à ce qu'il luy pleust ordonner *par prouision* ce qu'il auoit à faire pour la sepulture du corps du sieur de la Fayette decédé en & au dedans de ladite Paroice, que les Religieux Minimes de la place Royale pretendoient enterrer, en le troublant en la possession, en laquelle il est ainsi que les precedents Curez de ladite Paroice: Et ce, en attendant que la Cour aye donné Arrest definitif sur autre Requête qu'il a presentee dès le 11. de Mars dernier contre iceux Minimes tant pour ce Chef que pour plusieurs autres: Sur laquelle Requête du iour d'hier la Cour ayant mis, *viennent les parties demain* (qui estoit ce iourd'huy dixies-



me de ce mois ) à *sept heures du matin*, les choses demeurants en *estat* ; il auroit fait signifier & bailler par copie, tant ladite Requête que ladite Ordonnance de la Cour, du 9. de ce mois d'Auril, non seulement à Maître Pijault Procureur desdits *Minimes*, mais aussi ausdits *Minimes* de la place Royale, en leur Monastere, par l'*Anglois*, Huissier de la Cour, qui par son Exploit, suivant l'Ordonnance d'icelle, leur auroit enjoint de comparoir à ladite heure de *sept heures* en ladite Cour, pour respondre aux fins de ladite Requête & en outre à telles fins que de raison, & à eux fait les *deffences* ordonnées par ladite Cour : Au preiudice dequoy, & par un attentat manifeste contre l'autorité du Roy & de la Cour, ainsi que contre le droit diuin, & contre la Hierarchie & discipline de l'Eglise, lesdits Religieux *Minimes*, par voye du tout extraordinaire, force, & violence, ont fait enleuer ledit corps *sur les sept heures du soir*, du mesme iour 9. de ce mois d'Auril, & fait tirer iceluy corps del'Hostel de Vitry, où ledit sieur de la Fayette est decedé, sis au derriere de la place Royale, & iceluy corps mettre dans un caroce pour le conduire en leur Eglise, quoy que ledit Hostel en soit fort proche, surquoy ledit suppliant estant venu audit Hostel, assisté de six hommes d'Eglise, habitez en ladite Paroisse, au subiect d'une signification que lesdits *Minimes* luy auoient fait faire *sur les sept heures du soir*, qu'il eut à se transporter à la mesme heure pour faire enleuer le corps dudit de la Fayette, & ayant veu que l'on mettoit ledit corps dans un caroce, il se seroit aduancé avec lesdits Ecclesiastiques & deux Notaires, nommez *Fieffé & du Chesne*, qu'il auoit requis de le suivre, pour luy donner Acte de la contrauention que lesdits *Minimes* faisoient à ladite Ordonnance de la Cour, & de ce qui en outre se pourroit passer & faire ; Et que sans le vouloir attendre ny entendre, ceux qui conduisoient ledit corps auoient fait aduancer le caroce iusques à la porte d'une Cour, qui est deuant l'Eglise desdits *Minimes*, dans laquelle Cour estoient plusieurs *Minimes* avec cierges ardants en leurs mains, & aucuns d'iceux vestus de Rochets & Chappes, attendants ledit Corps ; lequel à l'instant fut tiré du caroce, & porté dans ladite Eglise : Ce que le suppliant voyant, il le suivit avec lesdits Ecclesiastiques : Et à l'instant iceux Religieux *Minimes* fermerent la porte de ladite Eglise, sans vouloir permettre que les Notaires y entraissent, & enfermerent, tant luy suppliant que lesdits Ecclesiastiques, & quelques autres personnes qui y estoient entrez ; Et comme il insistoit pour faire entrer lesdits Notaires, pour luy donner Acte de ce qui se passoit, ils luy dirent que les Notaires n'entreroient point, & que luy estoit bien impudent, qu'il n'auoit point de droit d'enterrer ce corps, qu'il leur appartenoit : Et leur ayant demandé à sortir, ils responderent qu'il ne sortiroit point par la mesme porte ; Et enfin ayant ouuert une autre des portes de leur Eglise, ils le pousserent avec telle violence, que peu s'en faillit que par plusieurs fois il ne tombast, & estant entre la porte pour sortir, ils fermerent icelle porte en sorte qu'ils luy ont enfermé la main droite, & pressée avec telle violence qu'il en est blezé au poignet, & y a eu du sang espendu, & faillit rouvrir ladite porte pour le laisser sortir & desgager sadite main ; dont il fait sa plainte à la Cour afin qu'il luy plaise de luy pourueoir, & pour cet effect luy permettre d'informer desdits attentats,



voyes de fait & violences & blessures, avec effusion de sang, circonstances & dependances. **CE CONSIDERE'**, Nosseigneurs, *il vous plaise* permettre au suppliant d'informer desdits attentats, excès, voyes de fait, violences, blessures, avec effusion de sang, circonstances & dependances; Mesme de faire publier Monitoire en la maniere accoustumée: Et pour faire ladite information, commettre tel de Nosseigneurs, qu'il vous plaira, pour ladite information faite & rapportée à la Cour, & communiquée à Monsieur le Procureur General, duquel le suppliant requiert l'adionction, luy estre fait droit, ainsi que la Cour verra estre à faire par raison: Et vous ferez bien. Signé, MAZURE. PAGEAU.

## ORDONNANCE DE LA COVR.

**SOIT MONSTRE' AV PROCVREVR GENERAL.**

*Faict en Parlement le 11. Avril 1641.*

## CONCLVSIONS de Monsieur le Procureur General.

**A** PRES auoir ouy Maistre Nicolas Mazure Curé de l'Eglise saint Paul, les Religieux Minimes de la place Royale, & Pijault leur Procureur, & veu l'Acte de sommation faite à la requeste de la Dame Mareschalle de Vitry, **IE REQVIERS** pour le Roy que d'office à ma requeste il soit informé de ce qui s'est passé le Mercredy au soir dixiesme du present mois d'Auril, tant au sortir de la maison de ladite Dame Mareschalle de Vitry, entrée de l'Eglise des Minimes, qu'au dedans d'icelle, lors que le corps mort du sieur de la Fayette y a esté porté; pour ce fait, & à moy communiqué, requérir ce que de raison. Signé, MOLE.

## ORDONNANCE DE LA COVR.

**S**E pouruoye le suppliant par deuers M<sup>re</sup> Louys du Tillet, Conseiller du Roy en ladite Cour, Commis sur autre Requeste, pour à son rapport estre fait droit, ainsi qu'il appartiendra. **FAICT** en Parlement le 17. Auril 1641.

## REQUESTE PRESENTÉE A LA COVR

*de Parlement, le 12. d'Auril 1641. par M<sup>re</sup> Nicolas Mazure, Curé de saint PAUL.*

## A NOSSEIGNEURS DE PARLEMENT.



**V**PPLIE humblement Nicolas Mazure Prestre, Docteur en Theologie de la Faculté de Paris & Maison de Sorbone, & Curé de l'Eglise Parochiale de saint Paul, **DISANT**, que du present mois d'Auril, il auroit présenté Requeste à la Cour, au subiect de l'enterrement du corps du sieur de la Fayette, que les Mini-



mes vouloient enterrer dans leur Eglise, au preiudice de sa possession, & droit qu'il a, & qui luy appartient, comme Curé de ladite Paroisse de S. Paul, au dedans de laquelle ledit de la Fayette est decédé: Et que sur ladite Requête la Cour auroit le mesme iour mis son Ordonnance, *Viennent les parties à sept heures du matin*, les choses demeurant en estat; Laquelle Ordonnance, ainsi que ladite Requête, il auroit fait signifier & bailler pour coppie ausdits Minimes en leur Monastere par l'Anglois Huissier de la Cour, dès le mesme iour; & qu'à sept heures du soir, d'iceluy iour, lesdits Minimes par vne contrauention manifeste à ladite Ordonnance de la Cour, & aux defences à eux faictes, suivant icelle par ledit Huissier, auroient fait enleuer ledit corps dans vn caroce: & comme il estoit ainsi enleué par eux, & par autres, qu'ils y emploient, le suppliant sur la sommation que lesdits Minimes luy auoient fait faire, à ladite heure de sept heures, seroit arriué, avec six Ecclesiastiques, Prestres habituez en ladite Paroisse, & auroit suiuy comme ledit corps estoit ainsi mené dans l'Eglise desdits Minimes, où estant entré avec lesdits Ecclesiastiques, lesdits Minimes auroient fermé la porte d'icelle, & grandement excédé, & mesme blezé avec effusion de sang en la main droicte, le suppliant, comme ils le faisoient sortir par vne autre porte, dont luy suppliant auroit fait sa plainte à la Cour, afin d'en informer: Et d'autant que pareille occasion d'enterrer les corps se peut presenter dès auioard'huy, demain & autre iour suivant, & que lesdits Minimes pourroient faire encore pareilles entreprises & violences, sous pretexte de l'appel par eux interiecté de Sentence, donnée par l'Official de Paris, le 9. d'Auril 1629. qui a esté suiue & confirmée par deux autres sentences, en datte dès 20. Octobre 1640. & 8. de ce mois d'Auril, toutes conformes aux saincts Decrets & Canons, & confirmatiues de la possession du suppliant, il requiert la Cour d'y pourueoir, & à cet effect ordonner que par prouision, & sans preiudice de l'appel, & de ladite instance, lesdites sentēces seront executees par prouision. CE CONSIDERE', Nosseigneurs, si vous plaise ordonner que lesdites Sentences dudit Official, pour ce qui est des enterremens des corps des decédez en la Paroisse, de laquelle le suppliant est Curé, seront executees par prouision, & nonobstant ledit appel & autres appellations, & oppositions faites ou à faire par lesdits Minimes, & sans preiudice d'icelles: Et vous ferez bien. Signé, MAZVRE. PAGEAV.

### ORDONNANCE DE LA COVR.

Parlent sommairement par deuant M<sup>e</sup> Louys du Tillet.  
Faiet en Parlement le 12. d'Auril 1641.

